

Kölner Verflichtung für Fredde

Dach för Daach wäde Minsche ohne Zahl Offer vun Fanatismus, Kreech un terroristische Aanschläch. Minsche wäden ömjebraat, messhandelt un entwürdig. All dat passeet unger dem Deckmäntelche vun Relijon. Uns Relijone ävver sin, wie meer selvs, jäje Terror un Hass, jäje Jewalt un och jäje Kreech en der Welt. Sujet erschöttert uns un foddert uns erus, uns ze besenne un ze handele.

Als jüdische, chresslije un muslimische Fraulück un Mannslück erkläre meer, dat Jewalt un Terror öm Joddes Welle nit sin dörfe un met dem wohre Jeis vun unse Relijone nix ze dunn hann. Uns Relijone sin drop us, dat alle Minsche, ejal zo welcher Relijon se jehöre, en Fredde un jäjensiggijem Verstonn zesammelevve. För uns jilt ohne Widdersproch: De Würde vun jedem einzele Minsch ess jesechert. Dat jilt för jede Puut, för jede Frau un för jede Mann!

Als Relijonsgemeinschaften du'mer uns verflichte:

- Jäje jede Verhetzung un Ernidderijung vun Minsche opzestonn
- För e friedlich Zesammelevve vun de Minsche vun unterschiedlije Relijone, Koltore un ethnische Jruppe enzetredde un Minsche zesammezebränge, die sich zeletz jescheut hann, met andere Kuntack opzenemme
- Dä andere zozehöre un denne ehr Angs genau esu ähnz ze nemme wie uns eije Angs
- Unse Beidraach för en Jesellschaff ze leiste, die nit bloß durch Toleranz jeprääch ess, nä, och dodurch, dat se ander Lück aachte deit un inne der nüdije Respeck erwies
- En Jesellschaff met opzebaue, en der jede Relijonsjemeischaff, die sich för Fredde un Jerächtichkeit ensetz, en Plaaz fingk, aan der et nix ze röddele jitt
- De Puute beizebränge, dat Vörordeile nix dauge un drop ze dränge, dat se jäjensiggich Verständnis för enein opbränge
- Doför jrad ze stonn, dat sich de Relijone jäjensiggich verstonn, dat se sich met Aanstand bejäne un metenein su disketeere, dat se ehr Jemeinsamkeite eruszfinge un ehr Ungerschiede aachte lihre

Met unser janze Kraff welle mer dozo beidrage, Hass un Jewalt hinger uns ze loße, un dat de Minsche en unser Stadt Kölle un üvverall op der Welt en Fredde,

Secherheit, Jeräächtichkeit un Feiheit levve künne. Meer lade alle Jemeinschafte un Initiative genau esu wie jede einzele Minsch en, ejal wie hä si Jläuve praktizeet odder wie hä de Welt süht, sich met uns ze verflichte un em selven Senn ze handele.